

Il barschament da Selva, ils 11 da zercladur 1949

da Gion Antoni Venzin (1896-1962), Rueras

Sissonta onns ein vargai dapi il sgarscheivel barschament dil vitg da Selva. Quei eveniment ei francaus fermamein ella populaziun sco disgrazia fetg tragica. Suenter il barschament ha la lavina da donaziuns caschunau gronds fastedis allas autoritads communalas e cantunalas ed era al pievel tuatschin ed oravontut als Selvaners. Il museum seregorda actualmein dils events cun ina exposiziun tut speciala cun bia fotografias e documents. En tut ei vegniu scret dabia sur da quei eveniment en quels sissonta onns. El relasch da Gion Antoni Venzin hai jeu anflau ina ulterira lavur sur digl incendi. Ella ei vegnida scretta cuort suenter la disgrazia ed ei ina cumpletaziun dallas biaras publicaziuns. Igl archivar Tarcisi Hendry



Il cronist

Gion Antoni Venzin ei il fegl vegl da Paul Giusep Venzin (1870-1926) e Maria Margheta Peder (1872-1908).

El ei carschius si ensemen cun in frar e quater soras. El ei staus ledis ed ha fatg il pur ensemen cun treis soras, l'Onna Maria (1898-1965), la Mariuschla (1904-1982) e la Ludivina (1906-1973). Gion Antoni ei vegnius malsauns e schiraus dallas combas ed ha ils davos 14 onns mai bandunau sia casa.

Per la cuminonza eis el staus quater onns ella suprastonza communal (1929-1932). El ei igl autur da pliras lavurs. El ha fatg ina resumaziun dils protocols da vischnaunca e rimnau ils nums dils officials da vischnaunca. El ha scret: Il fil dat teila, ina skizza culturala; Las alps da Tujetsch; Enzacontas expressiuns romontschas en Ischi 1962; Caltschina viva; La talpa; Currellas d'in cavrer; Giustia sil plaz, ina scena tuatschina; Il barschament da Selva; Lavinias e disgrazias gl'unviern 1951; Notizias sur dalla famiglia Venzin; Survesta dils capitans da mats Tujetsch. Siu relasch litterar, ses manuscrets ed auters documents sesanflan egl archiv communal en scatla 21/85/21.39 e scatla 21/152/21.110.1

Introducziun



Il vitg da Selva ei da vegl enneu staus exponius e tuccaus da disgrazias. Aschia ha la sgarscheivla lavina dils 12 e 13 da december 1808 a Selva custau la mort a 25 personas. Quei ei stau ina dallas pli trestas

disgrazias. Il cudischet “Selva avon 100 onns“ da pader Baseli Berther (1858-1931) raquenta aunc da beinenqual auter discletg.



Igl onn 1906 ha sur Murezi Elvedi da Cumbel, vegnend da Ferrera (Schmitten), surpriu la pastoraziun da Selva entochen 1935. Sia funitgasa, la Rosa Balzer, che saveva buca romontsch, ei stada cun el tochen la mort. Ella fuvava ina energica e magari vilada cuagl augsegner e culs vischins.

Sur Elvedi fuvava in bien predicatur, sribent e poet. Als capitani da mats da Tujetsch ha el procurau per bia plaids da Sontgilcrest. Dil rest fuvava el in buontad, in memia bien per in pievel empau selvadi, ch'ha adina giu plitost spirituals vegls.

Ils 21 d'october 1928 ha sur Elvedi celebrau sia secundezia da messa a Sedrun. Els 30 onns da sia pastoraziun a Selva vegn el a ver entuppau beinenqual quitaun, tonpli che las famiglias carschevan.

In mument era ei stau raschieni da stuer dar duas scolas, ina aunc a Tschamut. La casa da scola nova a Sutcrestas ei baghiada 1918. Empau avon vevan Mehel Loretz fatg si ina casa sut baselgia e Sep Lurenz Venzin ina casa sisum il vitg ed Augustin Venzin entadem il vitg. Il Duri Riedi ha dau 36 unviarns scola a Selva e quei da 1872 entochen 1908, Silsunter vegnevan ils scolasts buca vegls enta Selva. Els stevan mintgamai in per onns e da quei aunc bia scolastas. La scola anflava pign sustegn a casa.

Malgrad tut quei ha ei aunc dau en quella perioda enqual clar radi ord Selva. Gl'onn 1917 ha sur Gion Benedetg Venzin (1892-1955) detg messa nuviala. Siu bab Vigeli era mort 1902, ch'ils affons fuvan aunc pigns, mo lur mumma, la secunda dunna dil Vigeli, la Rosa Simonet (1860-1932) da Medel, fuvava strentga e teneva bein casa, moralmein e finanziamein.

Ils dus scolasts Peder, fatg examen 1927, han dau scola, il Barclamiu (1904-1985) a Rueras 1927-1938. El ha lu maridau la Luisia Schatz (1909) ed ei setratgs a Bonaduz. Il Gion Mihel (1904-1957) ha dau dus onns scola a Sedrun e lu da 1929 – 1949/50 a Rueras. Els eran fetg buns scolasts. A Selva fuvan els naturalmein mo la stad e vevan pintga influenza silla giuventetgna. Els 19 da fenadur 1924 ha sur Sep Flurin (1900-1980) da Flurin Venzin-Pally (1866-1944) e nevs da sur Hans Giachen Venzin (1871-1948) celebrau sia messa nuviala. Il sribent seregorda cun quet da quella biala damaun, ch'el ha sco capitani da mats menau la parada enta Selva e cumpignau il primiziant a Sedrun. Els 5 d'uost 1935 ha sur Elvedi bandunau per adina quest mund da travaglias el spital dalla Crusch a Cuera. El ei vegnius satraus a Cumbel.

Quei atun resignescha sur Hans Giachen (1871-1948) sia pleiv da Sumvitg e surpren la pastoraziun a Selva. Sunter 30 onns da greva pastoraziun a Sumvitg meritava el ina lavur empau pli leva. Selva vess forsia giu basegns d'in spiritual giuven, plein forzas ed energia, sch'ei vess dau. Sur Hans Giachen ha schau muncar nuot vid la premura. Mo sco vischin da leu ed en quellas relaziuns e cun siu temperament in tec da humor, fuvava ei fetg grev, sia posiziun e respect. Tier la mentalitad dil pievel, fagevan sias remarcas ironicas, humoristicas ina tut cuntraria impressiun ed effect. Ei vegneva perfin priu per malfatg, sch'el gidava siu frar Flurin che mava il davos bunamein en braucas ni siu nevs Paul Bendetg cun bia lavur, vid las lavurs da pur.

Denton ei lu 1941 vegniu en moviment l'arrundaziun dils praus a Selva. Sco en las bia caussas ei era cheu stau differents meinis. Sur Hans Giachen e ses parents eran fetg engaschai per la megliuraziun. Els giuvens fuvan en general persuerter. La megliuraziun era pli u meinis da ner basegns. Ei fuvava da quels, aschia la Margreta Venzin-Peder, che vevan 100 parcelas. Il project cun ina calculaziun da 220'000.- frs (90% subsidi) ei vegnius menaus ora e finius anno 1943. Els cuosts han survargau la calculaziun ed ein aunc oz, 1949, buca rugalai. La repartiziun finala dils praus, tuttavia el davos stadi, ha risviult bia dispetas e caneras, ch'ei mai bunas. Cul temps sto quella caussa denton esser da grond profit per Selva.

Il fenadur 1936 ha sur Giacomo Bernasconi, fegl d'inschigner Erminio Bernasconi (1876-1964), legiu sia messa nuviala sin Tschamut. Bernasconi ha giu cumprau la casa, villa dils impressaris Specia e Balloca, cu quels ein suenter la construcziun dalla viafier, da Rueras tochen sil Cuolm d'Ursera, setratgs naven. Bernasconi ha fatg bia per Tschamut. 1933 ha el pagau la renovaziun dalla caplutta da s.Clau e procurau per il conduct d'aua ed installau hidrants.

La famiglia da Mehel Antoni Loretz (1883-1953) ha giu duas disgrazias. Ils 15 d'october 1942 ei il fegl Isidor (1929), in buob da 13 onns, daus giud ina suga a S.Brida tier l'excursiun da scola e staus morts. Ils 27 d'october 1945 ei il Franz (1916), in giuven da 22 onns, daus giud ina suga da schar vegnir neu draussa sin Crestas Tschamut e staus morts.

Da s.Vigeli 1948 ei sur Hans Giachen (1871-1948), decan dil capetel grond, vegnius clamaus ord questa val da larmas per retscheiver la pagaglia dil Segner. Da S.Gions veva el aunc fatg messa, schegie ualti fleivels.

Duront la stad ei la pastoraziun seregulada empau cun paders da Mustér ni era cun spirituals en vacanzas ni cura sin Tschamut tier Bernasconi ni el hotel, cumpraus avon zacons onns da Benedetg Beer-Koller (1893-1979) ord la massa da Carl Caveng (1898-1937) artavels.

Igl εμπрем d'october 1848 ha lu sin giavisch da revendissim signur vicari general sur Benedetg Venzin (1892-1955), sur Stephan Schuler da Muothatal, staus avon caplon en Val s.Pieder, surpriu la pastoraziun da Selva. Cun tutta premura eis el semess vid igl imprender romontsch, ch'el ha gleiti saviu duvrrar in tec. Igl unviern ei vargaus levamein cun pauca neiv. Odem il mars era ei schon terren e la gliעד saveva entscheiver a luvrar.

Igl incendi



La notg dils 11 da zercladur 1949 ei stada per Selva la notg dalla terribla disgrazia. Circa in quart avon las diesch sededesta Paul Benedetg Venzin (1914-1978), in um che mava baul a letg, mo fuva era marvegls la damaun, che las flommas vegnend ord il clavau sut sia casa nova stada da siu quinau

Augustin Venzin, ius el Tessin, dattan sper las finiastras si. El sa mo spert dar alarm e prender ils affons ord letg, in mo da treis meins, ed empau resti ed ira cun dunna ed affons vi Surrein/Selva. Remarcabel che negin veva viu ad uras in aschi grond fiug. In mat, Monn da Sedrun, era pauc avon vegnius el vitg a mattauns, feglias da Sep Lurenz Venzin (1889-1975), e veva aunc engartau nuot. Ils umens ein spert sigli vid ils hidrants. Denton deva la Curnera ed il hidrant entadem ei prest staus circumdaus da fiug. Els vegnan buca da metter en funcziun, ch'il bischel peglia fiug ed ei ston fugir e schar tut agradgiu. Il fiug fa segls d'in baghetg a l'auter, tut ei gie vit e seccau ora. Ins emprova da metter en funcziun il secund hidrant sut casa pervenda, mo igl ei memia tard. Aschia ein ils hidrants mess neu 1926 cun grond cuost, stai da pauc gudogn. Ins sto fugir per mitschar cun la veta. Odem il vitg pon ins aunc dustar enqual caussa. Sur Schuler po spindrar il Sontgissim ed ina statua veglia da Nossadunna, mo sto schar barschar tut siu uorden en casa. Ils Sep Lurenz Venzin sisum il vitg han aunc pudiu dustar dabia uorden. Enagiumdem il vitg ei iu da cletg che la glied han pudiu mitschar. Leu ei barschau pli che vegn tiers manedels, ils tiers gronds veva ins vi Surrein ni sin Tschanmut. Denton arriva il succuors da Sedrun e Rueras cun lur sprezzas, ed era bein gleiti la sprezza da motor da purtar dalla Fort-Wache en auto neu d'Ursera. Il telefon a Selva ei prest staus sclaus ed ins ha telefonau da Tschanmut anora per agid. A Sedrun e Rueras ha il Gaudenz Loretz (1921-1972), che ha sez in jeep, clamau ed ils autos han spert spedi viaden umens ed iseglia. A Rueras ha ei curnau in tec avon las diesch, da tucrar ils zenns han ins emblidau.

Las flommas vargavan si igl Uaul Tschuppina da mirar en e devan encunter Nual e Muot ina clarezia sco da bi di. Ch'ins haveva a Selva cun buns hidrants stuiu schar dar ora schi spert in tal fiug, schava sminar mo la totala catastrofa. Tuts baghetgs da lenn ed il bia baghiau vidlunder ed aunc in tec suffel deva buc auter. Vegnend igl agid sil plaz, eran mo pli treis casas e la baselgia buca barschadas, mo per part gia pigliadas fiug. Per stizzar vegneva ussa mo l'aua dil Rein en damonda, mo sin quella distanza e differenza d'altezia pign agid.

Denton arrivan ils pumpiers d'Ursera cun lur squetra a motor, purtabla, cun apparat da forza. Cun tutta forza ed energia eisi mo stau pusseivel da dustar il fiug dallas duas casas novas 80 – 100 meters dador il vitg. Il resti ed uorden vevan ei stuiu dustar leu. Era la sprezza a motor da Trun ei arrivada ed ils pumpiers da Mustér, che vevan denton lur squetra a motor en reparatura digl incendi dalla notg avon a Mustér/Raveras. Ils pumpiers da Rueras e pli enconuschents han aunc mess en funcziun ils hidrants entadem il vitg. Mo sco sch'ei stuess esser, sevolva il suffel ed il fiug dat aunc ina ga sur las restonzas dil vitg. Ei sto vegnir consumau tut. Bunamein in evident castitg! Circa las endisch e mesa era il vitg barschais giu, deno la hetta e cascharia entadem.



Ord la baselgia veva sur Stephan Schuler saviu ira cul Sontgissim, ina statua veglia da Nossadunna renovada ed enzatgei paramenta. Ord la casa pervenda vegn el mo da deliberar siu bab, in um dad 88 onns. Scartiras e biars daners rimnai per la renovaziun dalla abselgia e sias biaras e bialas mobiglias menadas en igl atun, ei tut barschau. Il Toni Peder (1866-1959), stalter, in um dad 82 onns, ha mo pudiu schar ora ils tiers manedels e spindrar nuot. Siu fegl Ignazi (1911-1985) veva la posta ed ei tut restau el fiug. Ils umens eran sigli vid ils hidrants e suenter eisi stau memia tard. Affons e glied veglia han ins menau cun auto la notg a Rueras ni Tschanmut. Suenter mesanotg ei vegniu in ferm uradi che ha lu stizzau giu empau la burnida. La malaura dils suandonts dis ha bugnau la pauca cotgla vanzada sin las ruinas. Mo els tschalers e sut il stuors barschai dils tetgs, ha ei aunc cuau e fimau in per dis.

Naturalmein ha ei sco per regla en da quels cass, muncau era a Selva il saun giudezi. In seglia e metta daners e scartiras en ina scaffa da resti, siara e metta la clav en sac e fui cun empau resti da pauc giusut il vitg. Las mattauns d'ina famiglia dostan il resti e lur vestgius e laian barschar tut las maglias e resti da letg che vessan giu temps da spindrar. Ils tiers gronds e bia tiers manedels vevan ei vi Surrein.

Suenter il barschament



La glied ein vegni suttetg empau a Tschmut en privat, hotel e dependenza. Sur Schuler ei secasaus tier Attiger sin Tschamut. Entginas famiglias han saviu restar a Selva en las duas casas buca barschadas, enqual ein i on "Tujetsch" tier parents, a Rueras ni Sedrun. Biars vevan nuot auter ch'il resti si dies e quei aunc pauc avunda. L'otra damaun, ei fuva dumengia, han ils consums spedi cun jeeps a Tschamut duas cargas dallas pli urgentas victualias ed era ils pasterners han furniu dabia paun. Quei di ei gia vegniu rinnau els vitgs dalla val resti ed auters urgents effects e tarmess a Tschamut e Selva. Quei mument fuss ina gliesta stada necessaria e schar strihar quei che vegneva dau, per buca dar uorden malnizeivel.



Igl ei barschau 11 casas, en quei tschun dublas, la baselgia, ils zenns ein è luai e lu 20 baghetgs cul mulin. In student dalla claustra, staus cun auters aunc a Selva la notg, ha scret in rapport per l'Agentura svizra d'informaziuns SA, che vegn era daus sil radio cun recumandar ils donnegiai alla beneficenza. Il comite d'agid ei seconstituus, sur plevon Giusep Durschei (1911-1983) cun la suprastonza communal.

La posta e viafier han concediu spediziun libra. Denton arrivan a Sedrun e Tschamut dis ed jamnas daners e pachets e vaguns victualias, resti, uaffens, iseglia etc. Il comite lai publicar ch'ins seigi ussa provedius sufficientamein cun maglias ed uorden, mo daners seigien aunc adina beinvegna. Mo sin las staziuns spitgavan pertut la Svizra entuorn aunc vaguns rauba rinnada sin la spediziun. Odem il zercaldur, emprem fenadur stueva enqual di vegnir alarmau tut las femnas, mattatschs ed umens disponibels per discargar ora ils vaguns e cargar en autos e menar naven. In camiun da Turitg ei staus dis e dis a menar per nuot ed era ils jeeps da Tujetsch. Tut ils locals dallas scolas da Sedrun, Camischolas e Rueras, garaschas e remisas, era Lucas Cavegn (1883-1973) a Rueras, ei vegniu fullanau

en cun pachets ed uorden. Als da Selva ei vegniu partiu ora a Tschamut ni schau encurir ora a Sedrun tgei che vevan basegns.

Che quei reparter fuva cumbinau cun malemperneivladads, suspects e squidonzas era da capir tier la mentalitad da Selva. Ils effects eran buca tuttina, mintga di auters, forsa megliers. Ils suprastonts ed emploiats fuvan dis ed dis vid quellas lavurs, els eran unfis, forsa malidis e tedlavan nuota tuttas reclamaziuns. Aschia ch'igl ei vegniu puplau tochen tier la regenza. Tier il descargar ils numerus pachets ei pervia dall'imensa truscha buca adina vegniu luvrau endretg. Bia pachets adressai a privats da Selva d'enconuschents ein è restai en la truscha. Aschia ein è dabia pacs cun en victualias, carn etc, buca remarcau silla spediziun, selavagai. Lu fuvan era pacs cun en daners. Ins quintava approximativ cun 50'000 pacs. Il comite steva avon in legn. Il far ora e rugalar tut quei uorden era strusch pusseivel, ei vegneva il temps da fenar ed ei vess gnanc dau glied. El secrei che quella rauba seigi dada per ils da Selva, schegie ch'el veva spedi ord quella beneficenza in per vaguns als donnegiai da Mustér ed auters. El secrei dad esser cumpetents da reparter quella rauba. Quels comites han per regla buca da sedar giu cun surabundanza ed ei exista da quellas varts neginas ordinaziuns officialas. Mo ei sedi, nua che l'estga ei, leu ein era las evlas, ils tgapers.

Entuorn miez fenadur vegn baghegiu a Sedrun duas ed a Rueras ina baracca transportabla dil militer. A Selva era denton vegniu fatg sils mirs dils nuegls, empau reparai entras il militer, suschnas per metter en il fein. Igl uorden, pacs vegni, il bia resti, vegn empau alla ga fatgs ora spiraus ed exponius e vendius en quellas baraccas. Ils effects pendi suenter specia e qualitad vevan fixau il prezi. Il resti, vestagdira da tuttas sorts, calzers etc. fuva raschunau circa miez prezi. Mo effects novs fetg fuvan scarts, ei fuva pia ina gronda resca. Ei ha dau bia surprasas. All'entschatta han ins vendiu a Sedrun per clientella da Tujetsch, in tec alla ga han ins era schau saver en las proximas vischnauncas. Il davos arrivavan glied dall'entira Surselva e neu dalla Val d'Ursera. Ei vegneva fuolas ed ils vendiders pudevan buca sedustar e vegneva perfin engulau. Ins schava lu entrar mo 10 e quei suenter numra. A Rueras ha quei entschiet ils 9 d'uost e vegneva vendiu treis dis per jamna. Mintg'auter di fagevan las 8 – 10 emploiadas puspei ora empau pacs per redember quei ch'era vendiu ora. Igl ei franc ch'enqual han fatg en fachin, cumprau en massa da quei uorden ch'ins saveva è buca scumandar. Quella vendita ha natural dau bia da suspectar e manegiar, ed ein las patarlas possaunadas ora tochen Cuera e Turitg. In di vegn en il Tages Anzeiger da Turitg e secapescha era en la Neue Bündner Zeitung, la buna amitga dalla Surselva dil temps dalla afera dalla Greina, cun ina nauscha critica sur dil comite d'agid da Selva, la maniera da vender etc. Il responsabel dalla Winterhilfe a Cuera leva pari schon avon sepatrunar per nuot da quell'estga. Ils emploiats che gidavan cun las lavurs da sortirs e vender, savevan prender ora sco paga per lur lavur resti en la valeta da 20.- frs per di. Era quels ch'han gidau a descargar e maganisar ein vegni cuntentai cun resti.

La Neue Zürcher Zeitung ha lu tarmess rapportaders a Sedrun per intercurir e sinformar en caussa e quels san dar a lur gasetta in cuntenteivel rapport. Il comite vegn riscudius en las gasettas Bündner Tagblatt da dr. R. Stirniman e seriscudan sez aspramein en la Gasetta Romontscha.


Ils 16 d'uost scamonda la regenza l'ulteriura vendita e disposiziun, empermettend alla publicitad ina inquisiziun tiel comite per Selva. Ord ina uatga ei lu seresultau in cumpromiss, ch'ils da Selva ed il comite ein cuntents da schar il restont uorden dalla rinnada per Selva, ei pudevi esser aunc biabein la mesadad. Tochen lu era vendiu ora per circa 76'000.- frs. Empau pli bien uorden e resti fuva zavrau ora da fertontier e mess dad in maun per Selva. Il menar silla staziun Sedrun e cargar quels pacs, 20 vaguns, ha dau zacons dis lavur als Pfadfinders cun autos sut survegionza dalla Crusch cotschna. Il comite d'agid veva valetau il material els vaguns sin 150'000.- frs. Ina expertisa fatga dalla regenza ha schazegiau 190'000.- frs.

Il vender ora quella rauba ei stada ina disgraziada questiu per Tujetsch. Bia glied saveva buca cu ei vevan avunda. Ei deva da quels che schevan, e cun raschun, che quei seigi pli gronda disgrazia ch'il barschament da Selva. Schizun ils consums han encurschiu bein ch'ils daners muncavan. En quei risguard eisi mo da beneventar che quella rauba ei ida ord la val. Il comite Winterhilfe a Cuera ein sepurschi da dar ora als donnegiai uorden cura ch'ei vulan e che la valeta da quella rauba hagi da star en disposiziun per Selva ton sco fa basegns.

Las distribuziuns ord la rinnada han adina puspei dau rizrazs. A biars era ei mai endretg. Gl'atun 1949 ei ina partida i tier la suprastanza e vuliu far dar ora uorden restau anavos. La suprastanza, president e

cassier, han buca dau suatientscha, sereferend silla cunvegientscha cun Cuera ni per buca schar encurir ora mo ina part il bien. Entgins han lura rut en ina baracca. Ad in da quels han ins dau in brav castitg.

La reconstrucziun



La segirada da baghetgs cantunala ha schazegiau il donn sin frs. 421'000.-. Quella summa ei vegnida bonificada. La radunonza da vischnaunca dils 5 da mars 1950 ha approbau il plan da reconstrucziun da Selva cun 12 casas e 14 clavaus e la baselgia. La collecta quenta ins cun in ed $\frac{1}{4}$ milliun frs. Subsidi da baghegiar dalla Confederaziun 30'000 e dil Cantun era quei. La vischnaunca vess sut ina fuorma ni l'autra era da contribuir ton sco il Cantun. Ei vegn vendiu ina condotta lenna en sut Plaun las Cavorgias e quintau en il subsidi per gl'aqueduct. Entras la vischnaunca e sin giavisch da Selva vegn mess ina cumissiun per empruar da simplificar empau ils plans e cuosts dil project da baghiar che fuvan stai surdai agl inschigner Albert Lutz da Medel ed architect Venanzi Maissen, Cuera. Casas semplas fuvan calculadas cun 50'000.-, casas dublas 70 – 80'000.- frs. e clavaus 30'000.- frs. Ei ha denton seschau spargnar pauc dils plans memia grondius. La baselgia veva in fondo cumpriu la segirada da 36'000.- frs. Ord la massa dalla collecta quintava ins cun 44'000.-, sils quals igl uestg duess ver renunziu en bonis dil vischinadi. Ils 2 d'october 1949 ha la vischnaunca tractau pervia dil sulom dalla baselgia. Gion Battista Giger (1903-1988) vul dar 20 aras encunter 50 en in auter liug. Ina cumissiun duei survegnir la construcziun dalla casa pervenda. La casa pervenda da Sedrun veva custau 67'000.- frs. Ils 5 d'uost 1950 ha sur plevon Giusep Durschei benediu en il crap da fundament dalla baselgia.

La fin october 1950 ein tuttas casas sut tetg ed era la baselgia. Ils clavaus stuevan esser fini avon fenar. Las lavurs saveva il privat surdar a tgi ch'el leva, mo stueva denton vegnir fatg suenter plan entras miradurs e meisters indigens ed jasters. La firma Murer ha baghegiu la baselgia suenter plans da Furger. Ils da Selva han survegniu quarter zenns d'ina caplutta da Gersau fatga giu ed era dus altars. L'emprema gada ha ei tuciau da Nadal 1950.

Ina casa ha custau intrasglauter 45 – 50'000.- frs., clavaus 25 – 30'000.- frs. ed igl ei vegniu mess

totalmein vid il baghegiar 800'000.- frs. In tschuppel mellis ein magliai si d'inschigner ed architect e survigilonza. La vischnaunca ha mess 1950 circa 40'000.- frs.

Circa igl emprer november ein Gion Antoni Peder e Toni Loretz (1918-2003) secasai a Selva. Igl emprer december eran tuts puspei secasai a Selva, deno ils Vigeli Peder-Riedi, Vigeli (1892-1958) e Gion Mihel (1904-1957) stevan sin Tschamut ella casa da sia sora Barla Riedi d'Augustin el Tessin. Gion Antoni artavels han fatg si casa a Rueras.

Ulteriurs incendis

Sco sch'igl incendi da Selva fuss staus il fanal d'ulteriurs barschaments, han igl onn 1949 tutta stad erupziuns da fiug smanatschau en Tujetsch.

- Ils 14 da zercladur ei da miezdi pigliau fiug en in nuegl da Gion Antoni Monn amiez il vitg Sedrun (electricitad).

- Ils 17 da zercladur ei da mesanotg rut ora fiug en la nova ustria dalla Cruna a Sedrun, rests da cigaras el spidè, stizzau senza pli grond donn.

- Ils 6 d'uost, circa allas 3 suentermiezdi ei pigliau fiug in clavau a Gonda da Vigeli Beer (1892-1952), barschau mo quei clavau ed in piertg en nuegl.

- Ils 27 da settember ei da miezdi pigliau fiug en ina combra en casa da Gion Paul Berther a Camischolas (electricitad), barschau ora la combra.

- Ils 28 da settember allas 2 dalla notg ei pigliau fiug en clavau da frars Vigeli (1895-1974) e Placi Jacomet (1896-1975) e Hans Decurtins e barschau giu aunc l'auter baghetg da Placi Schmed artavels e Vigeli Monn a Sedrun, cun fein ed iseglia etc.

- 1950 ei barschau giu ils 13 da november il clavau da Paul Riedi a Mila cun 10 tschuncheismas fein.

Resumau ord il rapport final entras la Pro Juventute per mauns dil Departement d'educaziun dil Cantun Grischun.

Emprema part:

Immediat suenter la catastrofa

Dus meins suenter il barschament da Selva ha il Cussegl pign dil Grischun, sin fundament da critica ella pressa, surdau la repartiziun e vendita dils effects "Liebesgaben" da Selva alla Pro Juventute. Igl agid per Selva veva priu ina nunspetgada dimensiun. Da reparter l'entira rimnada vess ei tunschiu a scadina femna da Selva 500 vestgius, a scadin um 150 vestgius, a scadin donnegiau pli che 200 pèra calzers. (Naturalmein era bia pèra sandalas e diltutta rauba buca duvreivla.) Pli che 100 batlinis a scadin advont ed a scadin affon pli che 10 crotschas.

Il comite local steva avon in grev problem, engreviaus era che la mudestiad ed engraziament dils Selvaners era semidada en scuidonzas e suspects. Sut quella pressiu ei la repartiziun buca succedida sco ei vess udiu. Entschavend cun la vendita dils effects en bonis da Selva, ha quei priu fuormas ch'han leventau critica e lu ha la Winterhilfe vuliu sorprender quell'acziun e menar en undreivlas vias. A quei plan ein ils donnegiai sopponi. Pér las ordras dil Cussegl pign han fatg fin a quei traffichem.

Secunda part:

Surprendend la Pro Juventute l'acziun fuva aunc suenter la vendita da 6 jamnas aunc treis casas da scola pleina cun 30'000 pachets buca aviarts. En 5 baraccas da militer fuvan aunc mantuns resti, calzers, mobiglias ed uaffens in sur l'auter. Ils da Selva levan tuttina aunc buca schar menar naven quella rauba a Cuera per spirar e maganisar ed ei ha dau tumults e sedadas. Pfadfinders ed emploiai dalla Crusch Cotschna han cargau e menau sin la staziun da Sedrun. Ils 2 da settember ein 19 vaguns da quella rauba spedi a Cuera. Leu ein ils varga 250'000 artechels vegni sorti e maganisai.

L'inventarisaziun ha resultau ina valeta da varga 250'000.- frs. A Sedrun era aunc restau ina reserva. Ils Selvaners pretendevan sut smanatschas da reparter tut quei. Il november 1949 ei vegniu fatg ina attacca sin las baraccas, ch'ei denton vegniu disaprobau da biars da Selva. Suenter diversas contractivas ei quei material vanzau vegnius menaus Cuera il matg 1950, aunc 8 vaguns.

Il plan da reconstrucziun da Selva fuva calculaus cun 1'325'000.- frs. Al comite da baghegiar stevan 1'072'000.- frs a disposiziun. Suenter liungas contractivas cun uniuns svizras d'agid ha la Winterhilfe seporschiu da sorprender tut quels effects e reparter a famiglias basignusas per bass prezis e realisar quei en bonis da Selva aschi lunsch sco fa basegns.

Tiarza part

Propona la Pro Juventute da fixar normas e directives co organisar igl agid en cass da disgrazias. Ei vegn proponiu da scaffir in comite central cun in magasin per ils effects spendi pigl agid e che dess gl'empren agid cun adattai mettels. Il comite local vess da survigilar la distribuziun cun trer tier eventuals spezialists.

Dils daners duei vegnir menau quen ed eventual mess a tscheins. Naturalias danvonz dueien vegnir repartidas ad autras famiglias basignusas. Resti ed auters effects danvonz san vegnir magasinai en la centrala. Eventual scaffir in comite da reconstrucziun. Decider sch'ils donnegiai san pretender la valeta da tut la spenda per els, era sche buca necessari.

Adattau il text: T.Hendry 05-12-09